

**TEZĂUR LITURGIC**  
**24 IANUARIE**

**ACATISTUL**  
**SF. CUVIOASE**  
**VALENTINA**  
**SULKOVSKAIA**  
**DE LA MINSK**



**MOSCOVA, 2000**



## **Акафист**

### **блаженной Валентине Минской**

#### **Кондак 1**

Избранной Богом на сохранение веры  
Православный во дни гонений на земли  
Отечества нашего, хвалебное приносим ти  
пение, блаженная мати наша Валентино. Ты же,  
яко имущая дерзновение ко Господу, избави нас  
от зол душевных и телесных, да со умилением  
зовем ти:

Радуйся, блаженная Валентино, всех  
приходящих к тебе скоро утешающая.

#### **Икос 1**

Ангела дивна Белой Руси яви ты всея твари  
Создатель, обрати ты люди заблуждшия на путь  
покаяния и призвати их на служение Истине.  
Темже и мы, благодаряще Бога, прославляем ты,  
яко просветительницу и заступницу нашу, и  
усердно вопием ти:

Радуйся, пречудная избраннице Промысла  
Божественнаго;

Радуйся, звездо прекрасная небосвода  
церковнаго.

Радуйся, земли белорусския славное украшение;

Радуйся, душам нашим пресладкое утешение.  
Радуйся, в ходатайствах о нас неусыпающая;  
Радуйся, пламеню молитвы неугасающий.  
Радуйся, Матерь Божию непрестанно  
величающая;  
Радуйся, любити всех нелицемерно Ею  
наученная.  
Радуйся, блаженная Валентино, всех  
приходящих к тебе скоро утешающая.

### **Кондак 2**

Созерцала еси радостно, блаженная мати,  
красоту мира Божия, и любовь премногую к  
людem имела еси, от лет детских о всем  
благодарящи Бога ангельскою песнию: Аллилуиа.

### **Икос 2**

Разум имущи Божественный, угоднице Божия  
Валентино, от рождения твоего тщалася еси  
угождати Господу трудом, верою и молитвою.  
Еще младенец сущи, ель насадила еси, яже  
возрасте в древо крепкое во образе Креста. Мы  
же, видяще знамение благословения Божия на  
трудех твоих, гласы хвалебными взываем сице:  
Радуйся, благая отрасли корене благочестиваго;  
Радуйся, сестры имевши нрава молчаливаго.  
Радуйся, отца иерейскими молитвами в вере

утвержденная;

Радуйся, материю в любви к Богу, святым и ближним умудренная.

Радуйся, сладость райскую чтением Слова Божия вкусившая;

Радуйся, нежность и преданность сродникам щедро дарившая.

Радуйся, заповедь послушания родителем кротко исполнившая;

Радуйся, и нас ко исполнению велений Божиих призывающая.

Радуйся, блаженная Валентино, всех приходящих к тебе скоро утешающая.

### **Кондак 3**

Силою Вышняго укрепленной, в путешествии с родителем твоим во град Кронштадт явися ти святой Пантелеймон и рече: "Молися непрестанно!" И абие вознесла еси к Богу чистыя детские молитвы твоя, и избавлен бысть корабль от потопления, человецы же воспеша Творцу и Спасу благодарно: Аллилуиа.

### **Икос 3**

Имущи ревность многую о Господе, к пастырю Кронштадтскому притекла еси, блаженная, иже провидя в тебе избранный сосуд Божий, благослови тя, добрую отроковицу, и беседоваше

с тобою. Мы же, зряще духовное восхождение твое от силы в силу, со благоговением тебе взываем:

Радуйся, с младенства иереи окормляемая;  
Радуйся, от честных пресвитеров свято почитаемая.

Радуйся, измлада молитву возлюбившая;  
Радуйся, непрестанно Господу трудившаяся.  
Радуйся, нерадивых и ленивых исправляющая;  
Радуйся, к делом во славу Божию побуждающая.  
Радуйся, от Христа дар врачевания приемшая;  
Радуйся, чудотвореньми Бога прославлявшая.  
Радуйся, блаженная Валентино, всех приходящих к тебе скоро утешающая.

#### **Кондак 4**

Бури страстей избежавши, святая Валентино, и приемши благословение Божие и честных родителей, любовью и смирением созидала еси малую церковь семьи благочестивыя, подающи всем пример добродетельныя и кроткия жены, мужу помогающи и поющи Богу: Аллилуиа.

#### **Икос 4**

Слышавши Христоподражательную жизнь богоносных и великих отцев, со смирением и упованием на милость Божию сретила еси юдоль

плачевную земную - утрату сродников и добраго супруга твоего. Чад по плоти не даде ти Господь, обаче чада духовная во множестве обретошася ти смотрением Божиим, иже тебе, духовной матери своей, усердно восклицают:

Радуйся, благочестия учительнице;

Радуйся, тайных согрешений обличительнице.

Радуйся, многодетных семей покровительнице;

Радуйся, горделивых жен пред супругами смирительнице.

Радуйся, жены непраздныя от греха спасающая;

Радуйся, младенцев во чреве матернем сохраняющая.

Радуйся, гнев Божий молитвами твоими утворяющая;

Радуйся, умы и сердца наша к Небеси устремляющая.

Радуйся, блаженная Валентино, всех приходящих к тебе скоро утешающая.

### **Кондак 5**

Боготечной звезде уподобилася еси, мати Валентино: подвигу Ксении блаженныя подражаючи, удостоилася ты блаженства райскаго за великое смирение твое и терпение скорбей. Ныне же в лице святых воспеваеши Богу хвалу: Аллилуиа.

## Икос 5

Видевше тя людие, яко Ангела Божия,  
блаженства евангельская всем сердцем  
возлюбившую, притекаху к тебе, не могущей  
ходить, молитв от тебе ищуще. Ты же по глаголу  
Христову приходивших к тебе не отгоняла еси,  
но спасению человеческому ревностно служила  
еси. Научи убо и нас чистым сердцем славити  
Господа, тебе взывающих:

Радуйся, святость твою притчами скрывавшая;  
Радуйся, на тайныя вопросы явно отвечающая.  
Радуйся, жадных и скупых мягко обличающая;  
Радуйся, в добротворении верных  
утверждающая.

Радуйся, цветы и пояскй с молитвою  
сплетавшая;

Радуйся, сия всем приходившим раздающая;  
Радуйся, со Ксениею блаженною в един день  
величаемая;

Радуйся, с Матроною святою богоборцы  
посрамляющая.

Радуйся, блаженная Валентино, всех  
приходящих к тебе скоро утешающая.

## Кондак 6

Проповеднице веры Христовы и благочестия  
христианскаго, праведная Валентино, бури

богоборческие не устали еси, но подвиг исповедничества подъемши, души многих скорбящих и во мраке отчаяния пребывающих укрепляла еси, Господу поющи: Аллилуиа.

### **Икос 6**

Воссияла еси в немощной плоти светом небесным, святая Валентино, егда мудрейшим юродством, терпением и страданием Христу последовала еси. Сего ради яви тя Господь источник благодати страждущим людем, егда разорени быша храмы земли Минския. Мы же ублажаем тя звании сими:

Радуйся, в немощи человеческой силу Божию явившая;

Радуйся, спасению народа белорусскаго послужившая.

Радуйся, за исцеления мзду не приимавшая;

Радуйся, чистым сердцем Господа созерцавшая.

Радуйся, гонения за Истину подвигом юродства поправшая;

Радуйся, в мирстей жизни высоту иночества показавшая.

Радуйся, воли Божией себе предавшая;

Радуйся, Господню волю открывающая.

Радуйся, блаженная Валентино, всех приходящих к тебе скоро утешающая.

## Кондак 7

Хотя преблагий Господь страну нашу  
благодатию обогатити и дати образ хотящим  
спастися, подвиже тя Духом Святым на вельми  
скорбное и богоугодное житие, имже удивила  
еси не токмо человеков на земли, но и Ангелов  
на Небеси. Каждодневно тяготы людския  
носившая безропотно, услади любовьию и наши  
души, да поем с тобою Богу: Аллилуиа.

## Икос 7

Новую видяще тя избранницу Божию, издавеча  
течаху к тебе и пресвитеры церковнии,  
обретающе в тебе кладезь мудрости и  
Божественных откровений. Просвети убо и нас,  
с верою в помощь твою благодатную вопиющих  
сице:

Радуйся, честное Церкви похваление;

Радуйся, Ангела хранителя увеселение.

Радуйся, в делании духовном подвизающихся  
мудро укрепляющая;

Радуйся, Господа чисто славословит певчих  
научающая.

Радуйся, строителем храмов Божиих  
неоскудеваемо помогающая;

Радуйся, мольбами твоими от суеты и страстей  
нас избавляющая.

Радуйся, в недоуменный час печали полезныя  
помыслы ниспосылающая;  
Радуйся, предстоящих тебе и молящихся от бед  
соблюдающая.  
Радуйся, блаженная Валентино, всех  
приходящих к тебе скоро утешающая.

### **Кондак 8**

Странники сущия на земли сей, присно нас враг  
искушает, да не достигнем Отечества небеснаго.  
Помози нам, очисти ны от всякия скверны, да  
исправятся путие жизни нашея, да не постыдит  
нас Судия на нелицемерном и страшном Суде  
Своем. Молися о нас, Валентино всеблаженная,  
да с тобою возрадуемся: Аллилуиа.

### **Икос 8**

Всею мыслию у Господа водворялася еси, обаче  
и Матери Милующей, Царице Небесной,  
приносила еси пение умиленное, акафисты  
чести пред иконами Ея всех наставляющи.  
Темже тебе, теплой молитвеннице о нас к  
Препоблагословенной, взываем, праведная  
Валентино:

Радуйся, славу Приснодевы на всяк день  
воспевающая;  
Радуйся, чудотворныя иконы Пречистыя свято

почитающая.

Радуйся, образом Ахтырским дом твой  
благоговейно украсившая;

Радуйся, Богородицы молитвами  
тридесатолетнее лежание понесшая.

Радуйся, ангельским крилома в болезни  
утешенная;

Радуйся, на землей небеснаго посещения  
удостоенная.

Радуйся, на ложе твоём ангельскою чистотою  
сиявшая;

Радуйся, с терпением неистощимым болящим  
помогавшая.

Радуйся, блаженная Валентино, всех  
приходящих к тебе скоро утешающая.

### **Кондак 9**

Все естество ангельское удивися подвигу  
дивнаго лежания твоего: на одре твоём, яко на  
высоком столпе, духом к Небеси воспаряючи, от  
Духа прорицаючи и цельбы силою Божиею  
подаючи, никогоже от себе тща и неутешена  
отпущала еси. Мы же, таковому житию твоему  
дивящися, поем Всесильному Богу: Аллилуиа.

### **Икос 9**

Ветия многовещанная не возмогут воспети  
крепость любви твоея, блаженная, явилася бо

еси чадолюбивая мати скорбящим в тяжкую годину войны, молитвы возносила еси за воинство наше, помощи и заступления у Господа просящи. И ныне умоли Его в мире страны сохранять, сердца наша любовью наполнять, да благодарно зовем ти:

Радуйся, жизнь и смерть воинов, защитников наших, прозревающая;

Радуйся, ко усердной молитве за усопших сродников подвизающая.

Радуйся, мир Христов в маловерныя души вселяющая;

Радуйся, дыхание жизни хранить научающая.

Радуйся, любовь ко Отечеству земному показавшая;

Радуйся, величием подвига твоего всех удивившая.

Радуйся, веру апостольскую проповедавшая;

Радуйся, милосердием Царствие стяжавшая.

Радуйся, блаженная Валентино, всех приходящих к тебе скоро утешающая.

### **Кондак 10**

Спаستися хотяще от различных напастей мира сего, ты, праведная Валентино, многомощную молитвенницу к Богу призываем: буди нам неборимая защитница от враг видимых и

невидимых и помощница в нуждах и скорбех, избави же нас ходатайством твоим от лютых бед и искушений, да славим Бога победною песнию: Аллилуиа.

### **Икос 10**

Стена крепкая была еси всем во дни жития твоего, блаженная Валентино. Того ради и место погребения твоего прибежище духовное бысть чающим утешения в скорбном мире сем. Целебницу благодатную ты введуще, приходим ныне ко святому гробу твоему, и от него цельбы безмездныя душам и телесем нашим приемлюще, благодарственное воздаем ти пение:

Радуйся, лучами преславных чудес светло облистающая;

Радуйся, слепым очи предивно отверзающая.

Радуйся, лишенных смысла здравым умом снабдевающая;

Радуйся, беснующимся избавление подавающая.

Радуйся, вся недуги лютыя врачующая;

Радуйся, целомудрию дети наша научающая.

Радуйся, сердца ожесточенная умягчающая;

Радуйся, от сетей вражиих свободяющая.

Радуйся, блаженная Валентино, всех приходящих к тебе скоро утешающая.

## Кондак 11

Пением акафистным величаем тя, наставницу нашу, светло празднующи святую память твою. Ты же милостивно услыши малое моление сие, да и нас к лику мудрых дев сопричтет Господь Иисус Христос, радостно поющих Ему: Аллилуиа.

## Икос 11

О ветильниче духовный, елеем благодати исполненный, под спудом не сокрытый, святая Валентино, да прославляемо будет о тебе имя Господне! Освети и нам путь ко спасению, в вере и надежде укрепи, разума и благочестия от Бога испроси, да с любовью зовем ти:

Радуйся, образе истиннаго смирения;

Радуйся, зеркало самоотречения.

Радуйся, во псалмопении духом к Небу воспарявшая;

Радуйся, радость пасхальную в прославлении твоём даровавшая.

Радуйся, страдания временная ни во что же вменяющая;

Радуйся, изнемогающих во брани укрепляющая.

Радуйся, росой Духа душу твою омывшая;

Радуйся, цветник духовный дивно возраставшая.

Радуйся, блаженная Валентино, всех  
приходящих к тебе скоро утешающая.

### **Кондак 12**

Благодать Святаго Духа испроси нам, блаженная  
Валентино, да и мы, любовью Христовою  
окормляеми, возможем добре ходити во свете  
заповедей Божиих, да будем чада единыя  
Святыя, Соборныя и Апостольския Церкви, веру  
чисту соблюдающе, единым же сердцем и  
едиными усты Богу воспевающе: Аллилуиа.

### **Икос 12**

Поюще твоя премиогая благодеяния и  
страдания, ублажаем твое непостижимое  
терпение, мати Валентино, и чтуще святую  
память твою, молимся тебе: укрепи дух людей  
православных, даруй совершенную победу света  
боговедения над тьмою безбожия и приими  
похвальная сия:

Радуйся, веру Православную твердо содержать  
наставляющая;

Радуйся, раскол и суеверия искоряющая.

Радуйся, теплотою Божественныя любви души  
согревающая;

Радуйся, спасатися именем Иисусовым  
вразумляющая.

Радуйся, души и телеса наша благодатно  
исцеляющая;

Радуйся, о прославляющих тя Господа молящая.

Радуйся, ревнителей крестных ходов сугубо  
награждающая;

Радуйся, надеждою на спасение сердца верных  
увеселяющая.

Радуйся, блаженная Валентино, всех  
приходящих к тебе скоро утешающая.

### **Кондак 13**

О предивная и преславная угоднице Божия,  
блаженная мати наша Валентино, духовным  
солнцем Руси Белой возсиявшая! Приими сие  
благодарственное моление наше, и предстоящи  
ныне Престолу Господа нашего Иисуса Христа,  
умоли Его даровати нам телесное здравие,  
наипаче же душевное спасение, да в день  
судный радостно воспоем Ему: Аллилуиа.

**(Сей кондак глаголется трижды.)**



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

**І**

**НОВОЕ  
НЕБО**